

49 jare vol genade

1962	Die NG Kerk besluit om ondersoek in te stel of 'n leraar op tydelike of permanente basis lidmate in Europa en die VK vanuit Londen moet bedien.
1965	Dr JB van Zyl, wat reeds met studie in Europa is, word vanaf 1 Januarie 1965 in 'n tydelik-deeltydse hoedanigheid aangestel.
1967	Dr JP Grobler help gedurende 1967 vir drie maande met die bediening.
1968	Ds JA Hough word aangewys om die lewensvatbaarheid van gemeentestigting in die buiteland te bepaal. Hy beveel dit aan. Die Algemene Sinode versoek die Sinode van Noord-Transvaal om die besluit te implementeer. Voortrekkerhoogte word as vooggemeente aangewys. Gevolglik word die leraar(s) as kapelane deur Departement Verdediging na Europa uitgestuur. Departement van Buitelandse Sake neem in 1987 dié verantwoordelikheid oor.
1970	Ds OSH (Ockie) Raubenheimer (snr) word in 1970 deur die Algemene Kommissie vir Ampsbediening en Evangelisasie beroep om, as medeleraar van Voortrekkerhoogte, lidmate in die buiteland te bedien. Hulle word op 31 Oktober 1970 bevestig en vertrek op 3 Januarie 1971 na Parys en nie na Londen nie. Die gevoel was dat Parys meer sentraal geleë is as Londen. In die jare wat volg, word lidmate vanuit Parys bedien deur ds GDJ (Gert) Kruger (1975); ds H (Maans) Steyn (1978); ds WP (Willem) van Niekerk (1981); ds NC (Nick) Ackermann (1984); ds JJ (Kobus) van Zyl (1987); ds J (Johan) van Loggerenberg (1990).
1987	Buitelandse Sake neem verantwoordelikheid vir die predikantspos oor en ds Henno Cronje word, as gevolg van die toename in getalle van Suid Afrikaners, na Londen gestuur.
1990	Vanaf 1990 word lidmate deur ds JJ (Dirk) Oosthuizen bedien. Tydens 'n Kerkraadsvergadering op 15 Augustus 1992 word besin oor die moontlikheid om na die verkiesing in Suid-Afrika weer 'n leraar na Londen te stuur. 'n Kommissie olv oudl Jan Bredenkamp word aangewys om oor die toekoms van die gemeente te besin. Op 9 November 1992 lig leierouderling Kobus de Beer die lidmate in dat alle predikante in die buiteland vanaf 1 April 1993 na Suid Afrika terugverplaas gaan word. Die kerkraad besluit dat 'n nuwe gemeente gestig moet word.
1994	Op 27 Februarie 1994 word die SA Gemeente Londen gestig en as 'n "charity" geregistreer. Op 24 April 1994 word ds Dirk Oosthuizen as oorgangsleraar bevestig. Alhoewel kerklik verbonde aan die Nederduitse Gereformeerde Kerk in Suid-Afrika, word besluit dat die SA Gemeente ekumenies moet wees. Gelowiges uit enige kerk in SA moet vir die tydperk van hul verblyf in die VK by die gemeente 'n geestelike tuiste kon vind. Dit word ook gereflekteer in die naam van die gemeente: SA Gemeente Londen (Die Sentrale Kerkraad het later besluit dat die gemeente net as SA Gemeente bekend sal staan. Dit kan plaaslik aangepas word, bv SA Gemeente Birmingham). Ongeveer 80 mense woon elk van die twee eredienste per Sondag in die Kinema onder in SA Huis op Trafalgar Plein by.
1995-2007	Tussen 1995-2007 kom baie Suid-Afrikaners na Engeland vir werk en die SA Gemeente groei vinnig. Met die verandering in die "working holiday visa" vereistes, neem veral die aantal jongmense vinnig toe. Die gemeente reageer deur die struktuur en bedieningspunte aan te pas om die toename in getalle te hanteer. Drr Francois du Toit, Bennie Wolvaart (deelyds), Gavin Meistre, Ockie Raubenheimer,

	Dawie van Vuuren en Rian Steyn word beroep en later ds Christo Benade in die plek van Gavin en dr Ferdie Clasen in die plek van Ockie. Tydens die hoogtepunt in 2007 het ons 4 voltydse predikante en 3 gekontrakteerde predikers in diens en word 2 500+ lidmate per maand by een van 25 eredienste by 8 preekpunte in die VK bedien.
1995-2001	Dr FJ (Francois) & Olivia du Toit word as die eerste volwaardige leraar van SA Gemeente Londen bevestig. Francois vestig gemeentestrukture en getalle neem vinnig toe na gemiddeld 400+ lidmate by die onderskeie preekpunte.
1996-2001	Soos die visa vereistes verslap is, het daar 'n groot toevloei van jong volwassenes vanuit SA plaasgevind. Dr Bennie & Moira Wolvaardt neem op 'n deeltydse basis die leiding met getalle wat toeneem tot ongeveer 800 lidmate per aanddiens en twee eredienste per Sondag. 'n Uitgebreide reeks kursusse word aangebied.
2000-2007	'n Volgende fase van die bediening breek aan met die beroeping van dr Gavin & Elfriede Meistre as tweede voltydse leraar. Die gemeente het intussen geherstruktureer en gedentraliseer in drie wyksgemeentes, nl Noordwyk, Londenwyk en Suidwyk met een Sentrale Kerkraad as die koördinerende liggaam. Gavin neem verantwoordelikheid vir die bediening in Noordwyk, Bennie vir Londenwyk en Francois (en later Ockie) vir Suidwyk. Die gemeente groei sterk gedurende die periode. In 2007 aanvaar Gavin 'n beroep na Garsfontein gemeente in Suid Afrika.
2001-2013	Francois & Olivia tree in Junie 2001 af en dr Ockie & Annette Raubenheimer word in sy plek vir Suidwyk beroep. Ockie volg in sy pa se voetspore wat in 1970 die eerste predikant in die gemeente in Parys was. Suidwyk ervaar sterk groei en het preekpunte in Guildford en Sutton Valence (Maidstone). Weens groeiende getalle skuif Theydon Bois na Loughton en King's Cross na City Temple. Nuwe preekpunte word gevestig by Bristol, Norwich, Birmingham, Skotland (Edinburgh) en Ierland (Cork, Limerick en Dublin). Die aantal selgroepe groei na 170+ oor die hele Brittanje. Ockie tree na 12 jaar in 2013 af en keer na Pretoria in Suid Afrika terug.
2001-2009	Met die terugkeer van Bennie & Moira na die Veritasbediening in Suid Afrika, is dr Dawie & Alma van Vuuren as die derde voltydse leraarspaar met verantwoordelik vir Londenwyk beroep. Londenwyk bedien hoofsaaklik 'n jonger profiel lidmate en groei na meer as 1 000 lidmate per Sondag in die drie eredienste. In 2009 aanvaar Dawie 'n beroep na Brisbane in Australië en Rian verskuif vanaf Middellande na Londenwyk.
2005-tans	Die bediening in die Middellande brei aansienlik uit en dr Rian & Ronél Steyn word as vierde leraarspaar in 2005 vir 'n nuwe vierde wyksgemeente in Birmingham beroep. Die gemeente is goed gevestig. Die finansiële ineenstorting van die wêreld ekonomie in 2008 en verandering van die VK se beleid tov "working holiday visas" het egter 'n beduidende afname in die gemeente se aantal lidmate tot gevolg. Met die weggaan van Dawie word besluit om Rian na Londenwyk oor te plaas en die Middellande en Noordwyke saam te smelt.
2008-2012	Ds Christo & Anelie Benade het Gavin & Elfriede opgevolg as leraars vir Noordwyk wat nou ook Middellande insluit. Ds Jaco Beukes (deelyds) het intussen die Norwich preekpunt oorgeneem en ds André Harmzen (deelyds) die Bristol preekpunt. Christo het in 2012 'n beroep na Strand in Suid Afrika aanvaar en André Harmzen is as leraar vir Noordwyk gekontrakteer.
2013-tans	Na Ockie & Annette se aftrede, word dr Ferdie & Lizelle Clasen in Junie 2013 na Suidwyk beroep. Die SA Gemeente word in Londen en Suid as twee makro wyke geherstruktureer en Noordwyk en ander preekpunte word binne 'n makro groepering ingedeel. Ferdie, Rian en André vorm die kern leierskap.

